

Oqaasiliortut ataatsimiinnerannit imaqarniliaq

Sumiiffik:	Ilimmarfimmi ini nr. 4-mi
Ulloq:	30.09.2016
Nalunaaqutaq:	14:00 - 16:00
Oqaasiliortut peqataasut:	Bolatta M. Vahl, Mariia Simonsen, Juaaka Lyberth aamma Mette L. Lyberth
Ataatsimiinnermik aqutsisoq:	Mariia Simonsen
Peqataanngitsoq:	Jens Danielsen
Oqaasileriffimmiit peqataasut:	Katti Frederiksen aamma Tikaajaat Kristensen
Allatsi:	Minik Jeremiassen
Ataatsimiinnerup normua:	7

Oqaluuserisat

1. Oqaluuserisassat akuerineqarnerat
2. Kingullermik ataatsimiinnermi imaqarniliap akuerineqarnera
3. Oqaasileriffimmit ilisimatitsissutit
4. Oqaasiliortuni inuit aqqinik akuersisarnissaq pillugu
5. Oqaasiliortunut saaffiginnissutit
 - 5.1. MIO-miit taaguutit (eqqartorneqanngitsoorput)
 - 5.2. Ingerlatseqatigiiffiit assigiinngitsut taaguutaat (eqqartorneqanngitsoorput)
 - 5.3. Misigissutit (eqqartorneqanngitsoorput)
 - 5.4. Qallunaatut kisitsisit oqaasersiatut piunnaarlugit kalaallili oqaasiinut pulavissimasutut naatsorsuutigineqalernissaannik siunnersuut (eqqartorneqanngitsoorpoq)
6. Taasariaqartut allat
 - 6.1. Taasariaqartut allat
 - 6.2. Ataatsimeeqqinnissamut ulluliineq

Imaqarniliaq

1. Oqaluuserisassat akuerineqarnerat:

Oqaluuserisassani immikkoortut sisamaattut inissisimagaluartoq 'Oqaasileriffiup aningaasaqarneranik ilisimatitsineq' immikkoortut pingajuannut 'Oqaasileriffimmiit ilisimatitsissutit'-nut ilanngunneqarpoq oqaluuserisassallu akuerineqarlutik.

2. Kingullermik ataatsimiinnermi imaqarniliaq akuerineqarnera:

Aggustip 22-anni Oqaasiliortut ataatsimiinneranni imaqarniliaq akuerineqarpoq.

3. Oqaasileriffimmiit ilisimatitsissutit:

- Naalackersuisoqarfiup ataaniittut suliffeqarfiit tamarmik Naalackersuisoqarfimmiit ukiut tamaasa alakkarneqartarsimapput ukioq mannaluk aallarnerfigalugu Oqaasileriffik pulaarneqartalissaq. Tamanna siornatigut pisarsimanngilaq. Ilaatigut Naalackersuisoqarfimmiit sullinneqarnermut tunngasumik, aningaasatigut ingerlatsinikkut ajunngitsumik ingerlasoqarnerasoq aamma suliffeqarfimmi arlaannik amigaateqartoqarnerasoq paasiniarneqartassaaq.

- Siornatigut ilisimatitsissutaareeraluarpoq, kisianni Oqaasileriffik aningaasanik atuvallaartussaammat oktobarip qaammataani tapiliussatut aningaasaliissutinik qinnuteqartussaassaaq. Aningaasanik atuvallaarsimaneq Naalackersuisoqarfimmiit ilisimaneqarpoq. Aningaasanik atuvallaarsimaneq nutaamik serveritaarnerup aamma killiffilersuutinik nutarteriniarnerup kinguneranik pivoq, tunngavilersuutillu taakku Naalackersuisoqarfimmiit tutsuiginartutut isigineqarmata Oqaasileriffik ernumassutissaqanngitsoq Naalackersuisoqarfimmiit ilisimatitsisoqarsimavoq.

- Oqaasileriffik KNR-ilu kalaallisut oqaasit pillugit isumaqatigiissuteqarput. Tusagassiortut ataasiakkaat suliarisarsimasaat Oqaasileriffimmiit tiguneqartassapput kalaallisullu allagarisarsimasaat misissortassallugit. Tusagassiortut ataasiakkaat kukkunerit pillugit oqaloqateqartoqartassaaq taamaalilluni suut kukkuneqarnerusarnerisut, tassa iluarsisariallit suunersut, aaqqinniarneqassallutik.

- Oqaasileriffik maanna nutaamik serveritaarsimalerpoq aamma qarasaasiat nutaat pissarsiarineqarsimalereerput.

- Katti Frederiksen ENS-imi (Ekspertgruppen Nordens Sprogråd) ataatsimiinnermut Danmarkimi pisumut ataatsimiigiaqqammerpoq. ENS-imi ilaasortat tassaapput ministerrådeqarfinnut siunnersuisuunertut taaneqarsinnaasut. Ataatsimiinnermi ilaatigut avannaamiutoqatigiit inuusuttut naapikkaangamik oqaasit sorliit atortarsimanerannik misissuisimaneq eqqartorneqarsimavoq. Misissuisimaneq taanna aallaavigalugu atuagaq saqqummersinneqarsimasoq ateqarpoq *MAN SKAL BARE KASTE SIG UD I DET* (Uani aaneqarsinnaavoq:

<http://sprogkoordinationen.org/media/1337/man-skal-bare-kaste-sig-ud-i-det.pdf>)

Ataatsimiinnermilu tassani 2017-imi ilaasortanngortussanik nutaanik qinersisoqarnissaanik ilisimatitsissutigineqarsimammat Oktobarip 11-at nallertinnagu ilaasortassatut siunnersuuteqartoqariissaaq. ENS-imi ataatsimiittarneq Nordisk Sprogkoordinationikkut aaqqissuuttarpaat.

ENS pillugu annerusumik paasisaqarnerorusukkuit uunga iserit:

<http://sprogkoordinationen.org/aktoerer/ekspertgruppen/om-ekspertgruppen-nordens-sprograad/>

- Oqaasileriffik Australiami suliffeqarfimmiit APPEN-imiit suleqatigiumaneqarluni saaffigineqarpoq. APPEN-ikkut GPS-ini kalaallisut oqaluttartumik immiussisussamik pissarsiorput. Visit Greenland aamma saaffigineqarsimavoq. Oqaloqatigiinneq aatsaat aallartilermat Oqaasileriffik annerusumik ilisimasaqanngilaq.

4. Oqaasiliortuni inuit aqqinik akuersisarnissaq pillugu:

- Oqaasiliortut ataatsimiinnermi kingullermi aggustip 22-anni suleqatigiissitamik atersuisarnermi innersuussutiniq siunnersuuteqartussamik pilersitsipput. Suleqatigiissitaliap siunnersuutaa ataatsimiinnermi uani Oqaasiliortunit eqqartorneqassaaq.

- Atersuinermi innersuussutit pisoqqamit *Atersuisarnermut ilitsersuummit* 2006-imi novembarip 21-anneersumit allaaneruallaanngilaq.

- Aqqit Kalaallit Nunaanni akuersisat Danmarkimi atorneqarsinnaasarput, soorlu Danmarkimi aqqit akuersisat Kalaallit Nunaanni atorneqarsinnaasut. Inuit aqqi akuersisat sumi takuneqarsinnaanersut ilitsersuummi ersarissarneqarsimavoq, tassa Nuka Møllerip atuakkiaani *Kalaallit Aqqi*-ni aamma Oqaasileriffiup nittartagaani aqqit akuerineqartut takuneqarsinnaapput.

- Innersuussutini immikkoortut siullianni ima allassimavoq *"Aqqit allattaasitoqqap imaluunniit allattaasitaap malittarisassa atajoqqutaralugit allanneqartassapput. Aterni pioreersuni uiguusersuisoqarsinnaavoq atsiisarnermi ileqquusut najoqqutaralugit, takukkit uiguutit atorneqarnerit allattorsimaffiat"*.

Immikkoortoq una qanoq allanneqassanersoq aalajangiunneqanngikkallarpoq, tassa kalaallit aqqini naqinnerit sorliit atorneqartassanersut aalajangiiffigineqareerpat aatsaat qanoq allanneqarnissa aalajangiunneqassaaq.

- Innersuussutini immikkoortut aappaanni ima allassimavoq:

"Allamiut aqqi kalaallisuunngorsakkat atorneqarsinnaapput. Assersuutit ilanngussat takukkit"
Immikkoortoq taanna Oqaasiliortut akueraat.

- Immikkoortut pingajuanni allannguut maluginiagassaq pingaarutilik tassaavoq atsiinissaq qaammammik ataatsimik sioqqullugu atermik qinnuteqartoqartalissammat. Siornatigut atsiinissaq sapaatit akunnerinik pingasunik sioqqullugu qinnuteqartoqarsinnaagaluarpoq. Taama aalajangerneq pissuteqarpoq Oqaasiliortut qaammammut ataasiarlutik ataatsimiittarmata aamma aqqit qinnutigineqartut piffissaqarluarluni suliarisariaqarmata.

- Atersuinermi innersuussutit atuisussanit paatsoorneqaaqqunagit nassuiaasersorneqassasoq Oqaasiliortut aalajangiuppaat.

- Immikkoortut sisamaanni allassimasoq *"Allamiut aqqinut tunngatillugu danskit atsiisarneq pillugu inatsisaanni tunngaviusut najoqqutarineqassapput"* akuerineqarpoq. Taanna pillugu kipparissunnguup iluani ima nassuiaasoqarsimavoq: *"Danskit allamiulluunniit aqqi Danmarkimi Kirkeministeriamut saaffiginnissutigineqassapput"*. E-mailikkut allalluni sumut nassuussisoqassanersoq erseqqissumik allassimavoq.

- Atersuinermi innersuussutini immikkoortut tallimaanni Oqaasiliortuniit innersuussutigineqarpoq aqqit aterilerneqartussat tallimanit amerlanerussanngitsut. Aqqit marluk akornanni kittoraateeralikkat atertut marluttut naleqarput.

Taana innersuussuteqarneq aternik akuersisarneq biskopeqarfimmiikkallarmalli

atuutilersinneqarsimavoq. Taamanikkut ateqalersussaq arlalippassuarnik atserniarneqartarsimammat taama aalajangiisoqarsimavoq. Taama aalajangiussisimaneq killilersuinerunani innersuussinerullunilu pisariillisaaneruvoq. Oqaluttuassartaa nassuiaammut ilanngunneqassasoq Oqaasiliortut aalajangiuppaat.

- Naqinnerit sorliit kalaallit aqqini atorneqassappat?

Apeqput tamanna pillugu isummernissaq ullormut allamut aalajangersimanngitsumut kinguartinneqarpoq eqqarsaatigilluagassaanera peqqutigalugu.

Assersuutitut Aviaaja – Aviaaya eqqartorneqallatsiarpoq. Aviaaya Y-mik ilalik kalaallit aqqanit aallaaveqartinneqarluni Danmarkimi akuerisaasimavoq.

Tunamiut aqqisa Kitaamiutut allanneqartarnerat aamma eqqarsaatigineqassaaq, soorlu assersuutigalugu 'Ittimanngiiu'-mi D atuutilersinneqassanersoq eqqarsaatigineqassalluni. Sooq aterni ataasiakkaani D imaluunniit Y akuerisaappat allani akuerineqassanngila? Tassa apeqputit taama ittut ilaatigut eqqarsaatigineqassapput.

Tamatununga Juaaka ima oqaaseqarluni naggasiisuvoq: Oqaasiliortut suliassaraat inuiaqatigiit akornanni oqaatsit atorneqareersut akuerisassallugit. Maannakkut Iddimanngiiu inuiaqatigiinni arlaannaataluunniit D-mik sooq allanneqarsimanersoq apeqquusernaviannngilaa. Oqaasiliortut inuit atugaannik mattussisuunatik ammaassisuusariaqarput.

5. Oqaasiliortunut saaffiginnissutit:

Oqaasiliortuni aternik akuersisarnissaq ataatsimiinnermi uani pingaarnertut eqqartorneqartussatut aalajangerneqarnikummat Oqaasiliortukoortussat ataani allassimasut angumerineqanngitsoorput, kisianni suliassanut tulleriiaarneqarsimasunut ilaammata ataatsimiittarnerni tulliuuttuni oqaluuserineqartassapput.

5.1. MIO-miit taaguutit

5.2. Ingerlatseqatigiiffiit assigiinngitsut taaguutaat

5.3. Misigissutit

5.4. Qallunaatut kisitsisit oqaasersiatut piunnaarlugit kalaallili oqaasiinut pulavissimasutut naatsorsuutigineqalernissaannik siunnersuut

6. Taasariaqartut allat:

6.1. Taasariaqartut allat:

- Oqaasiliortuni oqaluuserisassat amerlanerpaat ataatsimiinnermi angumerineqartalerniassammata Oqaasiliortut aalajangerput immikkoortut 'Oqaasileriffiup aningaaqarneranik ilisimatitsineq' aamma 'Oqaasileriffimmiit ilisimatitsissutit' allaganngorlugit oqaluuserisassanut ilanngunneqartalissasut.

- Oqaasiliortut suliassaat ataatsimiinnermi angumerineqanngikkaanngata ataatsimiinnissami tullermi siulliullugit oqallisigineqartarnissaat kissatigineqarpoq.

Aammattaaq aalajangiunneqarpoq suliassiissutit allanit tamanit salliutinneqartassasut.-

6.2. Ataatsimeeqinnissamut ulluliineq:

Ataatsimiinnissaq tulleg pissaaq oktobarip 14-anni 2016 nal. 9:00-12:00 Ilimmarfimmi.

Ataatsimiinnissami immikkut sammineqassapput taaguutit MIO-miit suliassiissutigineqartut.

Oqaasiliortut

Bolatta M. Vahl, siulittaasoq

Juaaka Lyberth

Jens Danielsen

Mette L. Lyberth

Allatsi

Minik Jeremiassen